

Das Ludwigslied

	Einan kuning ueeiz ih, Heizsit her Hluduig, Ther gerno gode thionot: Ih ueeiz her imos lonot. Kind uuarth her faterlos, Thes uuarth imo sar buoz: Holoda inan truhtin, Magaczogo uuarth her sin.	
5	Gab her imo dugidi, Fronisc githigini, Stuol hier in Urankon. So bruche her es lang! Thaz gideilder thanne Sar mit Karlemanne, Bruoder sinemo, Thia czala uuuniono.	5
10	So thaz uuarth al gendiot, Koron uuolda sin god, Ob her arbeidi So iung tholon mahti.	10
	Lietz her heidine man Obar seo lidan, Thiot Urankono Manon sundiono. Sume sar uerlorane Uuurdun sum erkorane. Haranskara tholata Ther er misselebeta.	
15	Ther ther thanne thiob uuas, Ind er thanana ginas, Nam sina uaston: Sidh uuarth her guot man. Sum uuas luginari, Sum skachari, Sum fol loses, Ind er gibuoza sih thes.	15
20	Kuning uuas eruirrit, Thaz richi al girrit, Uuas erbolgan Krist: Leidhor, thes ingald iz! Thoh erbarmedes got, Uuisser alla thia not, Hiez her Hluduigan Tharot sar ritan:	20
	"Hluduig, kuning min, Hilph minan liutin! Heigun sa Northman Harto biduuungan."	
25	Thanne sprah Hluduig "Herro, so duon ih, Dot ni rette mir iz, Al thaz thu giviudist." Tho nam her godes urlub, Huob her gundfanon uf, Reit her thara in Urankon Ingagan Northmannon.	25
	Gode thancodun The sin beidodun,	
30	Qhadhun al: "fro min, So lango beidon uuir thin." Thanne sprah luto Hluduig ther guoto: "Trostet hiu, gisellion, Mine notstallon! Hera santa mih god Ioh mir selbo gibod,	30
	Ob hiu rat thuhti, Thaz ih hier geuuhti.	
35	Mih selbon ni sparoti, Uncih hiu gineriti. Nu uuillih, thaz mir uolgon Alle godes holdon. Giskerit ist thiu hieruuist So lango uuili Krist. Uuili her unsa hinuarth, Thero habet her giuualt.	35
	So uuer so hier in ellian Giduot godes uuillion,	
40	Quimit he gisund uz, Ih gilonon imoz, Bilibit her thar inne, Sinemo kunnie." Tho nam er skild indi sper, Ellianlichreit her, Uuolder uuuar errahchon Sinan uidarsahchon.	40
	Tho ni uuas iz buolang, Fand her thia Northman.	
45	Gode lob sageda, Her sihit thes her gereda. Ther kuning reit kuono, Sang lioth frono, Ioh alle saman sungun: "Kyrrieleison." Sang uuas gisungan, Uuig uuas bigunnan.	45

	Bluot skein in uuangon, Spilodun ther Urankon.	
50	Thar uaht thegeno gelih, Nichein soso Hluduig: Snel indi kuoni, Thaz uuas imo gekunni. Suman thuruhskluog her, Suman thuruhestah her. Her skancta cehanton Sinan fianton Bitteres lides. So uue hin hio thes libes!	50
55	Gilobot si thiu godes kraft: Hluduig uuarth sigihalt; Ioh allen heiligon thanc! Sin uuarth ther sigikamf. Uuolar abur Hluduig, Kuning uuigsalig! So garo soser hio uuas, So uuuar soses thurft uuas, Gihalde inan truhtin Bi sinan ergrehtin.—	55

Aus: Althochdeutsches Lesebuch, Hrsg. Ernst A. Ebbinghaus, Tübingen: Niemeyer Verlag